

SPORAZUM

IZMEĐU

VIJEĆA MINISTARA BOSNE I HERCEGOVINE

I

VLADE REPUBLIKE SRBIJE

O ODRŽAVANJU I REKONSTRUKCIJI CESTOVNIH MEĐUDRŽAVNIH MOSTOVA

IZMEĐU BOSNE I HERCEGOVINE I REPUBLIKE SRBIJE

Vijeće ministara Bosne i Hercegovine i Vlada Republike Srbije (u daljnjem tekstu: ugovorne strane), u vezi sa održavanjem i rekonstrukcijom cestovnih međudržavnih mostova na granici između Bosne i Hercegovine i Republike Srbije, sporazumjeli su se kako slijedi:

Član 1.

Opća odredba

Ovaj sporazum se odnosi na održavanje i rekonstrukciju sljedećih cestovnih međudržavnih mostova (u daljnjem tekstu: mostovi):

- Most preko rijeke Save - Sremska Rača/Rača (cestovni most);
- Most preko rijeke Save - Sremska Rača/Rača (cestovno-željeznički most);
- Most preko rijeke Drine - Trbušnica/Šepak;
- Most preko rijeke Drine - Mali Zvornik/Karakaj;
- Most preko rijeke Drine - Mali Zvornik/Zvornik, Most kralja Aleksandra;
- Most preko rijeke Drine - Ljubovija (Stari most)/Bratunac;
- Most preko rijeke Drine - Ljubovija (Novi most)/Bratunac;
- Most preko rijeke Drine - Bajina Bašta/Skelani;
- Most preko rijeke Uvac - Kapija 2 (ulaz u slobodnu zonu);
- Most preko rijeke Uvac - Most u Carevom polju;
- Most preko rijeke Uvac - Uvac/Uvac.

Član 2.

Definicija

Održavanje i rekonstrukcija mostova iz člana 1. ovog sporazuma podrazumijeva radove definirane propisima ugovornih strana.

Član 3. Podjela nadležnosti

Ugovorne strane se obavezuju da će se održavanje i rekonstrukcija mostova vršiti prema sljedećoj podjeli:

1. Bosna i Hercegovina:

- Most preko rijeke Save - Sremska Rača/Rača (cestovni most);
- Most preko rijeke Save - Sremska Rača/Rača (cestovno-željeznički most);
- Most preko rijeke Uvac - Kapija 2 (ulaz u slobodnu zonu);
- Most preko rijeke Uvac - Most u Carevom polju;
- Most preko rijeke Uvac - Uvac/Uvac;

2. Republika Srbija:

- Most preko rijeke Drine - Trbušnica/Šepak;
- Most preko rijeke Drine - Mali Zvornik/Karakaj;
- Most preko rijeke Drine - Mali Zvornik/Zvornik, Most kralja Aleksandra;
- Most preko rijeke Drine - Ljubovija (Stari most)/Bratunac;
- Most preko rijeke Drine - Ljubovija (Novi most)/Bratunac;
- Most preko rijeke Drine - Bajina Bašta/Skelani.

Član 4. Nadležnost za održavanje i rekonstrukciju mostova

Ugovorne strane su saglasne da će poslove u vezi sa održavanjem i rekonstrukcijom mostova obavljati nadležni organi ili druga pravna lica definirana zakonima i drugim propisima u državama ugovornih strana.

Nadležna ministarstva, navedena u članu 10. ovog sporazuma, će dostaviti podatke i informacije o nadležnim organima ili drugim pravnim licima za svaki pojedinačni most.

Nadležni organi ili druga pravna lica će na osnovu ovog sporazuma, u okviru svojih nadležnosti, vršiti poslove održavanja i rekonstrukcije mostova u skladu sa propisima u državama ugovornih strana.

Nadležni organi ili druga pravna lica će, za potrebe provođenja ovog sporazuma, osigurati i staviti na raspolaganje drugoj ugovornoj strani odgovarajuću dokumentaciju koja se tiče predmetnog mosta.

Nadležno ministarstvo države jedne ugovorne strane pravovremeno obavještava nadležno ministarstvo druge ugovorne strane o planiranim radnjama, privremenom režimu prometa i vremenu trajanja održavanja i rekonstrukcije mostova.

Član 5.
Zajednički operativni tim

Za praćenje, provođenje i primjenu odredbi ovog sporazuma nadležna ministarstva iz člana 10. ovog sporazuma će u roku od 60 dana od dana potpisivanja ovog sporazuma imenovati članove Zajedničkog operativnog tima.

Član 6.
Plan i program

Zajednički operativni tim će u roku od 6 (šest) mjeseci, od dana potpisivanja Sporazuma, pripremiti plan i program održavanja i rekonstrukcije mostova.

Plan i program održavanja i rekonstrukcije mostova sadrži izvještaj o stanju mostova, sa preporukama za potrebne vrste radova, procjenom finansijskih sredstava i dinamičkim planom.

Član 7.
Pregled mostova

Nadležni organi ili druga pravna lica će najmanje jednom u dvije godine obaviti pregled stanja mostova i sačiniti izvještaj o pregledu mostova.

Izvještaj iz stava 1. ovog člana obavezno se dostavlja nadležnom ministarstvu druge ugovorne strane.

Član 8.
Procedure, carine i porezi

Ugovorne strane su saglasne da učine napore u cilju pojednostavljenja carinskih procedura.

Ugovorne strane su saglasne da se na materijale i predmete, opremu, mašine i uređaje, koji će se koristiti za održavanje i rekonstrukciju mostova, ne naplaćuje carina i porez, druge dažbine i slična davanja pri njihovom unosu ili uvozu na carinsko područje države druge ugovorne strane, pod uvjetom da se isti dokazano ugrade ili upotrijebe tokom radova, odnosno dokazano vrate u carinsko područje odakle su uvezeni.

Kontrolu unosa ili uvoza, upotrebe i vraćanja predmeta iz stava 2. ovog člana provode carinske službe, u skladu sa važećim carinskim i drugim propisima država ugovornih strana.

Prije unosa ili uvoza, upotrebe i vraćanja predmeta iz stava 2. ovog člana, carinske službe ugovornih strana se obavezuju da će po dobijenom obrazloženom zahtjevu jedna drugoj dati saglasnost za svaki konkretan unos, uvoz, upotrebu i vraćanja predmeta.

Član 9.

Dozvole za izvođenje radova

Nadležni organi ili druga pravna lica pravovremeno osiguravaju dozvole i saglasnosti koje su potrebne za nesmetano izvođenje radova za održavanje i rekonstrukciju mostova.

Član 10.

Nadležna ministarstva za provođenje Sporazuma

Nadležna ministarstva za provođenje ovog sporazuma su:

- za Bosnu i Hercegovinu: Ministarstvo komunikacija i prometa,
- za Republiku Srbiju: Ministarstvo građevinarstva, saobraćaja i infrastrukture.

Član 11.

Rješavanje sporova

Svaki spor o tumačenju ili primjeni ovog sporazuma rješavat će se putem konsultacija i pregovora između ugovornih strana.

U slučaju da ne dođe do sporazumnog rješavanja eventualnih sporova putem konsultacija i pregovora, za njihovo rješavanje primjenjivat će se međunarodne pravne norme.

Član 12.

Odnos prema drugim međunarodnim ugovorima

Odredbe ovog sporazuma ne utječu na prava i obaveze utvrđene drugim međunarodnim ugovorima koji obavezuju ugovorne strane.

Odredbama ovog sporazuma, kao i njegovom primjenom, ne prejudicira se pitanje utvrđivanja i obilježavanja međudržavne granice između država ugovornih strana.

Član 13.

Završne odredbe

Ovaj sporazum stupa na snagu trideseti dan od dana prijema posljednjeg pisanog obavještenja kojim se ugovorne strane međusobno obavještavaju, diplomatskim putem, o ispunjenju uvjeta predviđenih njihovim unutrašnjim zakonodavstvom za njegovo stupanje na snagu.

Ovaj sporazum se privremeno primjenjuje danom njegovog potpisivanja.

Svaka od ugovornih strana može otkazati Sporazum diplomatskim putem. U tom slučaju ovaj sporazum prestaje da važi 6 (šest) mjeseci nakon dana prijema obavještenja o otkazu Sporazuma.

Ovaj sporazum se može izmijeniti i dopuniti uzajamnim pisanim dogovorom ugovornih strana. Izmjene i dopune stupaju na snagu u skladu s prvim stavom ovog člana.

Sastavljeno u Bratuncu, dana 18. 9. 2020. godine, u dva originala na službenim jezicima u Bosni i Hercegovini (bosanskom, hrvatskom i srpskom jeziku) i na srpskom jeziku, pri čemu su svi tekstovi jednako vjerodostojni.

**ZA VIJEĆE MINISTARA
BOSNE I HERCEGOVINE**

**ZA VLADU
REPUBLIKE SRBIJE**